

Članovi delegacije Bosne i Hercegovine, koji u Katovicama u Poljskoj učestvuju na 24. konferenciji Ujedinjenih nacija o klimatskim promjenama, nastavili su pregovore o projektima ublažavanja i prilagođavanja na klimatske promjene, a koji bi se trebali realizovati u oba bh. entiteta.

Značajni pregovori vođeni su u vezi s projektom "Unapređenje finansijske održivosti i jačanje otpornosti zaštićenih područja kroz uspostavu koncepta održivog rekreiranja i partnerstva sa privatnim sektorom", sa kojim će Ministarstvo za prostorno uređenje, građevinarstvo i ekologiju RS-a, kao nadležna institucija (focal point) za BiH, aplicirati za finansiranje kroz sedmi ciklus Globalnog fonda za životnu sredinu .

Cilj predloženog projekta je, kako je saopćeno iz tog ministarstva, postizanje unapređenja upravljanja zaštićenim područjima kroz ostvarivanje većih prihoda na osnovu održive rekreacije i pojačane otpornosti na klimatske promjene.

-Radi se o projektu koji se dijelom finansira iz bespovratnih sredstava GEF-a u iznosu od tri miliona dolara. Projekt je fokusiran na eliminisanje negativnih efekata na zaštićena područja, učestalih ekstremnih vremenskih prilika u posljedne dvije decenije (poplave, suše, klizišta, šumski požari, i slično), koji su uslovljeni klimatskim promjenama - rekla je ministrica za prostorno uređenje, građevinarstvo i ekologiju RS-a Srebrenka Golić, koja je nadležna osoba za provođenje Okvirne konvencije UN o klimatskim promjenama u ime Bosne i Hercegovine.

U okviru ovog projekta radit će se i na prilagođavanju zakonskog i planskog okvira, odnosno na kreiranju mjera za prilagođavanje i jačanje otpornosti zaštićenih područja na klimatske promjene, kako se ne bi ponovio slučaj iz Nacionalnog parkla Sutjeska, početkom ove godine.

-Sredstva bi trebala biti na raspolaganju 2020. godine, a predviđeno trajanje projekta je pet godina - rekla je Golić.

Članovi bh. delegacije sastali su se i s ministrom zaštite životne sredine Poljske Henrikom Kovalčikom i zamjenikom ministra energetike Gžegožem Tobišovskim .

Razmijenili su i iskustva o procesu pristupanja EU, s posebnim akcentom na prilagođavanje termoelektrana na ugalj evropskim standardima.

Izvor: energetika.ba